

Mukanda wa theti kwena Thimoti

1THIMOTI

Khotidi ya mukanda

Khumbu ya Thimoti yisi tumbuka mbala za lawu mu mukanda wa Mihangu mya Bathumwa yi muna mikanda mya Pholu. Kikuma Thimoti, musindikidi wa Pholu kákala mu kisalu kya Nzambi. Kámusindikila muna bitumu byandi bya lawu. Bitumu bya phasi lawu bakala mutuma kwena Pholu, mu kingenga, ku Tesalonika yi kuna Khoditu.

Mikanda myodi bámuhitika Thimoti. Básonikamya, hana mipfundila mya lukwikilu lwa bakidisitu basikudimya kedi. Butadidini, buthwena, kusya mu ndonga mambu ma Mabundu yi kuzyamisa lukwikilu lwa mawu.

Mukanda wa theti wubati hana ndongisila kwena bakidisitu, kwena bathwadisi ba kimvuka, yi kwena yandi-meni Thimoti.

Bakidisitu ba lawu bisi longa yi bifu (1:3-7; 4:1-4; 6:3-5). Bisi banza ni bima bya tsi mbi byenina. Yi hakana bisi bwisila longu yi kudya madya mahika. Kinga, byosu bina káhanga Nzambi mboti byenina. Thimoti kafweti bambukisa mamaña kwena bakidisitu.

Bimvuka bya bakidisitu bidiyidikini. Byenina yi bathwadisi. Babana benina bapfumu ba bimvuka; basadi bana bisi basadisa yi babana phi bisi sadisa baphutu, bambefu, bambuta ba

mabundu babana bisi twadisa yi kulonga muna
bimvuka.

Bimvuka meni byabina byenina yi mupfunu
wa kuzingila mu talala amana babatambwasa
muna tsi yosu. Mubindudi wa mukanda kabati
hana milongi mitadidi bisambu yi mutindu wa
kusadila bisambu (khaphu ya 2). Kabati songila
phi mutindu wuna fwani bazingila bathwadisi
(khaphu ya 3).

Thimoti kenina mwana bábuta kwena tata wa
mungeleki yi ngudi wa mukidisitu wa kisina
kya Bayuta. Pholu wámulonga amana kenina
kikuma kya yandi hanga mwana. Hanga wuki-
tuki mutwadisi, mbuta wa Mabundu. Mukanda
wubati mulomba mu kukala musadi wa bukheti
wa Yesu Kidisitu. Mukanda wubati musongila
buna bulungi mu kutsasa batu muna kimvuka,
yi mana kafweti longa yi kulomba kwena kosu
mutu (khaphu ya 4 yi kuna 6).

Mboti

¹ Pholu, thumwa wa Kidisitu Yesu mu kitumu
kya Nzambi, Muhuludi wetu, yi Kidisitu Yesu,
kivuvu kyetu.

² Kwena Thimotia mwana wama wa kyedika
mu lukwikilu: khenda, kheni yi ngemba bituki
kwena Nzambi, Tata, yi kwena Kidisitu Yesu,
Pfumu wetu.

Kukebisa kikuma kya malongi ma luvunu

a **1:2 1:2** Mhb 16:1.

³ Bwosu yíkuhekila kikesa ha yíkala ku Masetwani, ni wanangina ku Efesu ndangu wabakandisa batu babana babati longa malongi ma luvunu,

⁴ amana balandikilaku bingana-ngana keti ndonga ya butuka yakonda tsuka yina yisi nata tendu hana henina kisalu kya Nzambi, kina kibati salama mu lukwikilu.

⁵ Kisina kya kukebisa meni kuna, kyenina zola dina dyisi tuka ku mbundu ya kasemi, ku katsatsa ka kasemi yi lukwikilu lwakonda bukavungalosi.

⁶ Ndambu ya batu bahika bátota, amana báditotisa mu mameni ma phamba.

⁷ Bazodi bakituka balongi ba mitsiku kaasi bisiku bakisa mana bisi zonza, keti mambu mama bisi tambwasa kya makulu.

⁸ Eeh, tuzayibwa ni mitsiku myenina mya bukheti, yuka ni twasadilamya mu mutindu wuna wulungini;

⁹ Tuzayibwa phi ni mitsiku myásalamaku kikuma kya mukwa masonga, kaasi kikuma kya bandwandwa yi bakolami, batu bambi yi basumuki, basafu yi bazangi, bahondi ba batata yi bahondi ba bamama, baba bisi honda batu,

¹⁰ bita-mbongi, bayakala bana bisi dinimbisa yi bakwawu bayakala, batu baba bisi sala kikhita kya bahika, bakwa bukamvi, batu baba bisiku zenga ndefi ya masonga yi mambu mahika mama misiku fwanana yi malongi ma kyedika,

¹¹ malongi mafwanana yi Musamu wa Bukheti wa khembu ya Nzambi wa kyesi wuna kápheka meni Pholu.

Kukala kabanzi ku mamboti ma Nzambi

¹² Yimuvutwadi matondu lawu Kidisitu Yesu Pfumu wetu wuna wuphekini ngolu. Mukuma wámbona ni walunga yenina; yi hana katsidini mu kisalu,

¹³ meni yandu yikala musafula theti, kumunyokuna yi kumutukwana. Kaasi yandi wángyukila kheni, mudyambu yikalaku zaya mambu yikala sala, kukonda kwa lukwikilub.

¹⁴ Amana khenda za Pfumu wetu zábasa, hakimosi yi lukwikilu yi zola dina dyenina mwena Kidisitu Yesu.

¹⁵ Ndinga yayi yenina ya kyedika, bafweti tambwasaya: Kidisitu Yesu kísá ha tsi yayi kikuma kya kuhulula basumuki; muna kati dya bawu, meni yenina wa mbi kuhyoka boosu.

¹⁶ Kaasi kikuma kya bwabuna, muna siphá dya mbundu wángyukila kheni, ndangu mwena meni, yenina wa mbi kuluta boosu, kuna thwala batu balanda mbandu ya meni, bakwikila mwena Kidisitu Yesu, ndangu babonga moyá wa mvula yi mvula.

¹⁷ Amana kwena Kyamvu wa mvula yi mvula, wuna wisiku fwa, wuna wisiku monika, Nzambi mosi, kabonga luzitu yi lukumu mvula yi mvula! Abwabuna!

¹⁸ Kima yikutumi ngeyi mwana wama Thimoti, kituma meni kina kifwanani yi mbikutulu zina batekila samuna kikuma kya ngeyi; ndangu ha walándilaza, wanwana muzingu wa bukheti,

¹⁹ wasimbidilaka lukwikilu lwaku yi katsatsa ka kasemi, kakana bakonda yukila batu bahika amana bamani totisa lukwikilu lwa bawu.

²⁰ Mukati dya bawu thwenina yi Kimeni yi Lekizandi; babana yibalambulad kedi kwa Satana ndangu bazaya ni ka mboti ku mu kulewulaka Nzambi.

2

Malongi matadidini lombilu

¹ Kima kya theti yiluhekidini kikesa, lwananaka bizitu byenu, bilomba, lwabokwadilaka yi kuvutulaka matondu kikuma kya batu boosu,

² kikuma kya bakyamvu yi kikuma kya boosu babana benina yi biyeka, ndangu twalenga kala yi luzingu lwa talala yi luzitu lwosu muna kuyekamina kwena Nzambi.

³ Bwabuna bwenina bukheti amana kisibwa tambwasa Nzambi, Muhuludi wetu,

⁴ wuna wisi zola ni batu boosu bahuluka amana balenga tula mu kuzaya kyedika^a.

⁵ Mukuma Nzambi mosi kenina, amana phi mukhundikisib mosi kenina hana kati dya Nzambi yi batu, mutu meni wuna kenina Kidisitu Yesu,

⁶ yandi wádihana yandi-meni hanga thuka kikuma kya batu boosu: kyakina kimbangi kyáhanama muna tangwa dya kyawud.

d **1:20 1:20** Haka, Pholu kabati zimbula ni kazodiku kuhana muswa kwena bawu boodi mu kukala hika mu kati kya Dibundi.

a **2:4 2:4** Yez 18:23. b **2:5 2:5** Yesu kenina mukhundingisi ha kati dya betu yi Nzambi. Disongidila ni wuna wisi tukhundingisa.

d **2:6 2:6** Mth 20:28.

⁷ Kyakina bángyadikila meni, yikala mbambala, thumwa e yi kiyeka kya kulonga, kwena babana bakondi kala Bayuta, lukwikilu yi kyedika. Nzonzibwa mu kyedika, phuniku.

⁸ Kikuma kya bwabuna, nzodi ni bayakala boosu balombilaka kosu homa, bathutaka ku zilu moku ma bawu ma kasemi, konda kukalaka yi khabu keti tendu.

⁹ Kitesu kimosi phi, bakhetu bavwataka mutindu wa bukheti, wa luzitu, konda kudizatisa; badihandaku tsuki, keti bilunga bya wolu yi misanga keti miledi mihti thaluf,

¹⁰ kaasi bavwata mihangu mya bukheti, bwosu buna bufwanini kwena bakhetu babana bisi monika ni bisi dihana kwena Nzambi.

¹¹ Bakhetu bafweti yukaka malongi mu talala yi kulemvuka kwosu.

¹² Phaniku muswa kwena bakhetu mu kulonga, ho loni kubonga kiyeka ku thwala ya bayakala; bafweti kala talala.

¹³ Kikuma, Atamu watheti batekila sala, Evwa ku manima nana.

¹⁴ Amana ka Atamu ku wáhunakana, kaasi mukhetu, yandi wáhunakana, wákolama ku mutsiku wa Nzambih.

¹⁵ Kaasi mukhetu kahúlukila muna bana babana kabuta, ho ni kakwamina muna lukwikilu, muna lungongu yi muna kuditomisa, ha kimosi yi kudikengaka.

3

Batwadisi ba Dibundu

¹ Ndinga yayi yenina ya kyedika: Honi mutu kasola kukala mutwadisi, kisalu kya kitoku lawu kasodi.

² Bulungi ni mutwadisi kakala konda kikalu, kafweti kala yakala wákwela mukhetu mosi, kisiku lutikisa kitesu, kadikengaka, kadizitisaka, kayambaka batu, kazaya kulonga,

³ kadihanaku mu kunwa malafu, kakalaku mukwa kingolu-ngolu; kaasi kakala mutu wa talala, mutu wa ngemba, kazolukaku mbongu;

⁴ katwadisaka bukheti nzu yandi amana bana bandi balemvukaka, mu luzitu lwosu.

⁵ Amana, honi mutu kisiku twadisa mboti batu benina muna nzu yandi, abweti kalenda twadisila Dibundu dya Nzambi?

⁶ Kakalaku mukidisitu wa pha; kondilo kadtiksakana nana mu lulendu hanga ku tsuka kabonga nana ndola bwosu yina ya kiphidi-mutu.

⁷ Bulungini kakala yi kimbangi kya mboti kwena batu babana bakondi kala bakwikidi, ndangu bamulewulaku amana kabwa nana mu mutambu wa kiphidi-mutua.

Basyelu

⁸ Basyelu phi mutindu wumosi, bulungini bakalaka batu ba luzitu amana bakalaku batu ba ndinga zodi; balendaku dihanaka ku malafu ata kusosa miluta mya luvunu;

⁹ bafweti simbidila diswekamu dya lukwikilu muna katsatsa ka kasemi.

¹⁰ Babazyamina theti ku thwala ya kusala kisalu, yuka ni bakala batu bakonda kikalu.

a **3:7 3:7** Tit 1:6-9.

11 Mutindu mosi phi, bakhetu bafweti kala bana bisi zitisa, kondza mbonzi, bisiku hitikisa kitesu, batu bisi sila mbundu mu mambu moosu.

12 Basyelu bafweti kwela kaka mukhetu mosi amana batwadisaka bukheti bana ba bawu yi nzu ya bawu meni.

13 Mukuma basyelu babana básalakya bukheti kisalu babazatisa yi kikumbwala kya lukwikilu kina kyenina mwena Kidisitu Yesu.

Kitsweki kya mbuta

14 Yikusonikini mukanda wawu yi kivuvu ni ka thama ku, yikwísa kutala.

15 Kaasi honi yizyeta, wazáya khi bikalulu wakadiki byawu mu nzu ya Nzambi, yina yenina Dibundu dya Nzambi wa moyu, yina yenina kunzi amana disi zyamisa mambu ma kyedika.

16 Eeh, bulungi lwazayabwa, diswekamu ditadidini mambu ma kinzambi dyenina dya mbuta: Kidisitu,
kisa monika mu lutu lwa kimutu,
wádimonikisa mutu wa masonga muna nzila ya

Kitembu Kyatomab,
amana banzyo bámumona.

Batu báyadingisa musamu wa Kidisitu ha kati
dya babana bakondi kala Bayuta,
bámukwikila kwena batu ba tsi,
bámutombula mu khembu ya ku zilu.

4

Malongi ma luvunu

¹ Kinga Kitembu kazonzibwa wengele: muna matangwa ma tsuka, batu bahika batótisalwa lukwikilu ndangu benda dihana ku bitembu byabina byisi hukumuna yi ku malongi ma bitembu bya mbi,

² muna mutindu wa kavungalosi ka babana bisi longa mambu ma bukamvi, katsatsa ka bawu meni kenina ka zina ku kisengu kina kisi bema yi mbawu ya kabengi.

³ Batu babana bisi longa ni batu bakwelaku amana bisi bwisa ni badyaku bima byabi kásala Nzambi, kinga Nzambi kásadilabya ndangu, babana benina bakwikidi, bazayi phi kyedika, badyakabya mu kuvutulaka matondu.

⁴ Kinga bima byosu kásala Nzambi byenina bya bukheta, amana kweku ata kima kimosi bafwani kulosa, yukani badyabya mu kuvutulaka matondu kwena Nzambi.

⁵ Kikuma byosu byenina byasambuka muna ndinga ya Nzambi yi muna lombilu.

Musadi wa bukheti wa Yesu Kidisitu

⁶ Ho wabalongaka baphangi bakidisitu malongi mamana, wakála musadi wa bukheti wa Kidisitu Yesu; wuna wisi longuka ndinga za lukwikilu yi malongi ma bukheti mamana wisi bonga kedi mboti-mboti.

⁷ Kaasi wutambwasakaku phandi za phamba, mameni ma bambuta ba bakhetu mana mata-didiku lukwikilu. Dihanaka theti mu mambu ma kinzambi.

⁸ Mukuma tsaka za lutu zenina bukheti mu mambu makonda mupfunu, kaasi mambu ma

kinzambi menina mupfunu mu mambu moosu:
menina yi bilangi bya luzingu, kikuma kya
luzingu lwa buthwena yi bilumbu bya ku thwala.

⁹ Ndinga yayi yenina ya kyedika amana
yafwana mu kutambwasa kwena boosu:

¹⁰ Kikuma, ho tubati diyangisa yi kunwanaka,
mudyambu thwisi sya kivuvu kyetu mwena
Nzambi wa moyu, wuna wenina Muhuludi wa
batu boosu, batheti bakwikidi.

¹¹ Tala mamana yikusendini mu kulongaka.

¹² Ka mutu ku kalewula kingunza kyaku; kaasi
ngeyi kala mbandu kwena bakwikidi, muna
ndinga, muna khadidi, muna zola, muna lukwik-
ili yi muna kasemi.

¹³ Yikuna yikwisila, dihanaka mu kutangaka
Masonuku ha mesu ma batub^b, mu kuhanaka
kikesa yi mu kulongaka.

¹⁴ Wulewulaku kabu dina wátambula my nzila
ya khenda dina wenina dyawu, dina wabonga
muna nzila ya mbikutulu, tangwa bákusya moku
kwena kibuka kya bambuta.

¹⁵ Simbidila mambu mama, dihana mu kisalu
kyaki ndangu babana babati kuyuka bamóna ni
kosu kima wubati sala, ku thwala kibati kwenda.

¹⁶ Dikengaka ngeyi meni yi muna malongi
maku; sikila mwamuna. Mukuma ha wasadiki
bwabuna, wadihulula ngeyi-meni hakimosi yi
babana bisi kuyuka.

b ^{4:13 4:13} Kutanga kwaku kwa Masonuku ku mesu ma batu
kwákala hanga kutanga kuna bakala sadila mu nzu ya kimvuka
Bayuta.

5

Mambu ma kusala kwena bakwetu

¹ Wukayaku mununu mu khabu, kaasi muheka kikesa hanga mbedi ni tata waku^a. Basyamisa bangunza hanga baphangi,

² binunu bya bakhetu hanga bamama, bandumba hanga baphangi ba bakhetu, yi kusema kwosu.

³ Basadisa mboti-mboti bafwidi ba mukwandi.

⁴ Ho mufwidi kakala yi bana kondilo yi batekulu, bulungi mboti bayandika kusongila bifu bya kinzambi muna katy kya nzu ya bawu amana babasadisaka binunu bya bawu; mukuma bwabuna kisi tambwasa Nzambi.

⁵ Mufwidi wa mukwandi, yandi wuna wásala yandi hika, wasya kivuvu kyandi mwena Nzambi; kisi kwamina phipha yi mwini muna bizitu byandi yi muna bisambu.

⁶ Kaasi mufwidi yandu wisi zingila mu tsambu, wafwa kedi mbatanana kisi monika ni moyo kenina.

⁷ Tala mambu mama yikutumini mu kubasonikina, ndangu bakala konda kikalu.

⁸ Amana ho mutu wisiku sadisa biwutu byandi, theti-theti babana benina mu nzu yandi, wutunilwa lukwikilu, wa mbi lawu kuluta wuna wukondi kala mukwikidi.

⁹ Mufwidi, ku thwala ya kumusonikisa mu ndonga ya bafwidi, bulungi kakala yi mvula kuluta makumi sambanu, kakala phi mukhetu bakwela kwena yakala mosi;

a **5:1 5:1** Lev 19:32.

10 kakala phi yi kimbangi kya mihangu mya bukheti: mutindu wuna kakala tsatsila mbotimboti bana bandi, kakala yambila batu ku nzu, kakala sukwala bitambi bya batu ba Nzambib, kikuma kya bwabuna kakala yakidila batu baba baka mu phasi yi mutindu wuna kakala dihanina mu kosu mihangu mya bukheti.

11 Kikuma kya bafwidi baba beku kedi bambuta, lubasonikisaku ku mukanda; kikuma ha bayuka hika tsambu ya kukwela, badihanaku kwena Kidisitu

12 amana dyakala ni babafundisa kikuma kya buna babebisini mutindu wa theti wa kudihana kwena Kidisitu.

13 Dikwawu phi, bwosu benina bamolu, basanda benda kangala mu nzu za lawu, bwosu batsúkinaku lwesi mu kukala bamolu, bazonziki lawu amana bakotiki kosu dyambu, bazonzaka ata mambu mana mafwaniku mu kuzonza.

14 Kikuma kya bwabuna, yizola ni bangunza ba bafwidi bakwelaka, babuta bana, bakala batwadisi ba bukheti muna nzu za bawu; ndangu bamuheka nana nzila mbeni ya kwenda tuhuna musamu.

15 Mukuma kwenina yi bafwidi bahika baba batoti kedi mu kulanda Satana.

16 Ho mukwikidi mosi wa mukhetu kakala yi biwutu byandi bya bafwidi, kabasadisaka amana Dibundu dibongaku kiyeka, ndangu Dibundu kalenga sadisa lwesi baba benina kyedika bafwidi.

17 Kwena bambuta ba Dibundu bana bisi

twadisa bukheti, bulungi babahekaka luzitudo mbala zodi, kuluta lawu babana bisi dihana lawu mu Ndinga ya Nzambi yi mu kulonga.

¹⁸ Kikuma Masonuku mazonzini: «Wamukasaku munwa ngombi tangwa kabati nika ngenza», amana: «Bulungi musadi kabonga lufutu lwandie.»

¹⁹ Wutambwasaku mutu mosi kisa funda mbuta, akolu ni bakala bambangi bodi kondilo batatu.

²⁰ Batu baba basadi masumu, bakaya ku thwala ya batu boosu, ndangu batu bahika bayukaka bweya.

²¹ Yikusikidikisi ku thwala ya Nzambi, ku thwala ya Kidisitu Yesu yi ku thwala ya banzyo babana básolama, mu kusadila mikuku myami buna bufwani konda kusola mbunzu za batu.

²² Wutsutsaku mu kusya mutu moku. Kalaku mu kithwadi yi mutu wuna wusadi masumu; kala wa kasemi ngeyi-meni.

²³ Wunwakaku lwesi mamba; sadilaka phi koma ka vinu, kikuma kya mukati yi buna wisi kuyangisa.

²⁴ Masumu ma batu bahika mazayakani wen-gele amana misi tekidila mu pfundusu; kwena batu bahika misi landa ku manima.

²⁵ Mutindu mosi, mihangu mya bukheti myisi zayakana: ata myami mya mbi, mina tubatiku mona buthwena, myalendaku swamana.

d **5:17** **5:17** Masonuku mahika mazimbudi ni lufutu. e **5:18**

5:18 Klg 25:4 yi 1Ko 9:9; Mth 10:10; Luk 10:7.

6

¹ Batu baba benina mu kizitu kya kihika bulungi mboti babazitisaka bapfumu ba bawu, ndangu balewasaku zina dya Nzambi yi malongi mama balonga.

² Ho bawu bakala yi bapfumu ba bakwikidi, bafwaniku ni babakondaka luzitu mu mvunga ni benina baphangi ba bawu. Kaasi bafweti basadila kuluta, kikuma benina bakwikidi yi biwutu bya bawu bya kutya bisi sadila.

Malongi ma mbi yi bimvwama bya kyedika

Tala mambu mama wufweti longa yi kutuma.

³ Ho mutu kamwangaka malongi mahika konda kulandaka malongi ma kyedika ma Pfumu wetu Yesu Kidisitu yi malongi mana ma kinzambi,

⁴ kenina mutu wabasa yi lulendu, kazayiku kima; kimbefu kyandi kya kunanama yi ngyuma zitadidi mihowu. Kwakuna kwisi butuka kiphala, matendu, kutukwana, kubongilaka bakwenu mabanza ma mbi,

⁵ kutendana kwa konda tsuka kwa batu babana benina yi mayedi mazangana, makonda kyedika, bawu bisi dila mu mvunga za kinzambi.

⁶ Kinga, kinzambi kyenina yi muluta wa lawu, ho wasangwalaka mu kina wenina kyawu.

⁷ Kikuma, thwisaku yi kima mu tsi, amana twalendaku nata phi keti kima.

⁸ Muna bwabuna, ho twakala yi madya yi miledi, byabina byatufwana kwetu.

⁹ Kaasi batu babana bisi sanda bakituka bamvwama bisi bwa mu kimeka, mu mutambu

yi mu tsatu za lawu za buzoba yi za phasi, zisi banata mu kuzangana yi mu lufwa.

¹⁰ Mukuma zola dya mbongu dyenina kisina kya mbi zoosu, amana batu bahika bádihana mwamuna, báditotisa kyana yi lukwikilu amana bádinyokuna bawu meni.

Ndongisila za tsuka

¹¹ Kaasi ngeyi, mutu wa Nzambi, hangakaku mambu ma buna. Sandaka masonga, kinzambi, lukwikilu, zola, sipha dya mbundu, lembami.

¹² Nwana muzingu wa bukheti wa lukwikilu, simbidila moyo wa mvula yi mvula, wuna bákutedila yi kikuma kya bwabuna wátambwasila dyambu ku thwala ya bambangi balawu.

¹³ Yikuhekini muswa ku thwala ya Nzambi, wuna wisi hulula moyo kwena bihangwa byosu yi ku thwala ya Yesu Kidisitu, wuna wáhana kimbangi mu kutambwasa dyambu ku thwala ya Phosi Philatu,

¹⁴ mu kusimbidilaka mikuku konda kifu, konda kikalú, tii yikuna kakwisa monikina Pfumu wetu Yesu Kidisitu.

¹⁵ Kumonika kwakuna kwa Pfumu wetu kwasálama muna tangwa dina kásila Nzambi wa kyesi yi Pfumu lwesi, Kyamvu wa bakyamvu yi Pfumu wa bapfumua.

¹⁶ Yandi wuna lwesi wisiku fwa, mwena yandi mwenina yi mwini wumosi bisiku tala; keti mutu khaniku kamonawa amana kalendawoku mona;

a **6:15 6:15** Klg 10:17; Mkg 136:3.

kwena Yandi, lukumu yi ngolu zilutini za mvula yi mvula! Abwabuna!

17 Senda kwena baba benina yi bimvwama mu tsi yayi ni bakalaku yi lulendu amana basyaku kivuvu mu bimvwama byakonda kwatakanib; kaasi kivuvu kya bawu kyakala mwena Nzambi wuna wisi tuheka byosu bya lawu, ndangu byatuhekaka kyesi.

18 Basenda ni basalaka mambu mamboti, bakalaka bamvwama muna mihangu mya bukheti, bakalaka yi kyesi kya kukabila batu bahika.

19 Balumbikaka bwabuna kimvwama kya bukheti yi kya ngolu kikuma kya tangwa dina dyakwísad, ndangu babonga moyo wa kyedika.

20 Muzitu Thimoti, batika bukheti kima kina bákuheka. Wunanamakaku mu phandi za phamba yi za masafu yi phaka za luvunu, zina bisi mona hangambedi ni mazaya.

21 Kikuma, batu bahika, bwosu bázola mu kulanda mazaya meni mamana, bátotisa nzila ya bawu ya lukwikilu.

Khenda zakala kwena benu!

**Yaka NT
The New Testament in the Yaka language of the
Democratic Republic of the Congo**

copyright © 2022 The Seed Company in coordination with Forum Communautaire des Traducteurs de la Bible et Alphabétisation

Language: (Yaka)

Contributor: Coordination Inter-Eglises pour l'Alphabétisation et Traduction en Langues Gabonaises

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files
dated 10 Jul 2025
bbfa98c9-db25-5a12-b9aa-d16c7103581d